

Dis ist gewilkort durch alle dry rete vnd dy gemeyne durch volbort des gerichtis anno domini 20. L quinto.

Nach dem ‚gelben Buche‘ fol. 115 im Rathsarchiv zu Leipzig.
Im Auszug Dresdner gelehrte Anzeigen 1799 Stück 22 S. 169.

No. 318. 1455. 15. Sept.

Der kurfürstliche Amtmann und die drei Bürgermeister entscheiden im Auftrag der kurfürstlichen Rätthe und unter Zuziehung einiger erfahrenen Mühlmeister Streitigkeiten zwischen den Müllern der Thomas- und der Barfußmühle.

Wir nachgeschreibenn Hans Trupitz in den gezzeiten amptmann zu Leiptzk, Reinhart Steube, Jacobus Messeberg doctor vnd Hans Thummel alle burgermeister doselbst bekennen —, das wir von beuelunge der erbern vnd gestrengen Hanses von Kokeritz houemeisters, Ottenn Spigels zcu Grunaw gesessenn heymlicher vnd rethe des hochgebornen vnd irluchten fursten vnd hern hern Friderichs herzcogen zu Sachsen etc. nach vnderwißunge vnd erkenntnis etlicher erfarder wyssender vorstendiger molmeister nemlichen Sixtus zu Czeppelitz, Hanns mollers vor der stadt Ileburg, Nickel moller von Cleberg vnd Nickel moller zcu Dolitz gesessenn geteydinget vnd eine vortracht, eynunge, sune gemacht vnd einen vsspruch gethan haben zwuschen dem erhafftigen ern Vlrich moller, Ludwige vnd Jacoffe seinen brudern mollern in der Thomasmuell vor Leiptzk vff einer vnd Michel mollere in der Barfußmol doselbst by Liptzk vnd siner swegere vorlassenen witwen seliges gedechtnis Caspar mollers vnnd iren erben vff die andere seyte inmasen also hirnach geschriben stehit. Zum ersten haben wir gnanten gleitzman vnd burgermeister vßgesprochen, das der moller in der Barfußmol by Liptzk sal machen vnd halden einenn oberfall ader teylbawm obenwenig seiner schrotmol by dem bewmechen in vnnd vff seinem eigen vffere, vnnd sal den oberfall machen acht ellen lang vnd weyt ane des mollers in der Thomasmoll schadenn ader hinderniß, vnd sal den oberfal nicht hoche halden, denn die schutzbret vff seinem vachbawme sindt, also wenn das wasser ober die schutzbreth fellet, das es dann auch ober den oberfall ader teylbawme falle. Auch sall der gnante moller in der Barfüssenmol seine schutzbret nicht hoche vff vnd ober seinem vachbowme haldenn, denn einer ellen vnnd zweier dawmen breyt hoch, vnd sal den gnanten oberfall machen vnd bereyten vor sente Mertens tage nehstkommende. Auch ist beredt vmbe den schutzstrang bey dem thyrgarten, das der muller in der Barfußmol sal den gnanten schutzstrang halden in der hoche vnnd wythe also der vor alder gewest vnd gehalten ist vnd nicht hoche noch enger.

Disse obengeschreibenn stucke vnnd artickel haben sich beide partige vff beyden siten vorwillet, geret vnd gelobet vnwidderrufflich zuhalden, vnd domitte sollen alle schelnus vnd errethum zwuschen den gnanten partigen gantz gericht vnd hengelegt sin. Dabey sindt gewest die erbaren vnd gestrengen Hans Krowene vorsteher des iungfrawenn closters by Liptzk, Hanns von Brode voit des iungfrawenn closters zu Sußelitz, die sulcher teydinge vonn der gnanter zweyer vnd beyder iung-